



220163

kat.komp



Mag. St. Dr.

P

Teat. 5257

Rywocki Joannis J. Triumphus quem D. Ca-
simiro Princeps Jescens. Rex Vladislaus IV.
a. 1636 Vilnae exhibuit.

TRIVMPHVS
QVEM
D. CASIMIRO
PRINCIPI

Serenissimus ac Insuperissimus

VLADISLAVS IV.
POLONIÆ ET SVECIAE REX



Magnificâ ac piâ

in augustum Paternæ liberalitatis
Mausoleum deductione

*Anno M. DC. XXXVI. Augusti 14.
Vilnæ exhibuit*

PANEGYRICO
repræsentatus

Et Serenissimis Polonia ac Suecia Principibus

IOANNI CASIMIRO, & CA-
ROLO FERDINANDO F. F.

A. P. IOANNE RYWOCKI Societatis IESV
Theologo, & Eloquentiæ Professore

Ipsò eiusdem D. natali die exhibitus.

VILNÆ, Typis Academicis Societatis IESV,
Anno Domini 1637.

DEDICATIO

Gemina Vobis orbis decora fero PRINCIPES SERENISSIMI, Dium CASIMIRVM, & REGEM FRATREM. Amabitis in illo sanctitatem, & patrocinium; in isto pietatem: in utroq; Vestrum sanguinem. Quibus alijs in suum Mausoleum euntis, deducentisque offerrem TRIVMPHVM, nisi Vobis? quos & communio magni sanguinis, & conspirantis expressio virtutis vnum in MANIPVLVM late adorandum collegit. Vt nam CASIMIRIANÆ theatrum volubile pompæ oculis libere, & sequi datum fuisset, exultantis profectio POLONIÆ ac LITVANIÆ viscera de proximo palpauissetis; illa viscera, quæ sublimis CASIMIRI spiritus cælo deuolutus ab alto animabat. vidissetis confertam omnium ordinum aciem, cælum non tam vocare votis, quam aggredi & rapere manibus. impleuissetis geminâ Vestrâ luce, utpote iam plenâ trium Fratrum Sororisq; CORONA, CAPVT magni Ducatus VILNAM; sed, & restagnantis in Vos effusæ sacræq; voluptatis impetum sensumq; recepissetis. Nunc vero, quod publicæ negarunt curæ oculis, intuentur manibus, includitur pectoribus, indeque in immensum æternitatis cælum, Vobis veluti duobus Cardinibus Polissq; concurrentibus, extenditur & consecratur. Accipietis credo alacres, REX enim est, & quidem REGVM qui Vos adit, REX animorum, qui Vos quærit CASIMIRVS. Illius namque resflorescenti Gloriz, duo maximi POLONIARVM REGES, PATER fundamentum deponens, FILIVS culmen perficiens, supplici auro curaque seruiunt. At qui REGES? nempe illi, quorum sub pedibus purpurei victorijs regnisque Tyranni, puluerulenti gemuerunt. Aperietis quocirca communi sanguini, in animos vestros auctiore cum Gloria sese inuehenti, hospitales fores. Sanè PATER cum FRATRE gemina veluti brachia, eius molem cum sacris ossibus sustentent, vbi maximus sui mundi que Victor gloriose conquiescat: Vos ab his omnibus, virtutum lineamenta ducetis, ut feliciter ÆTERNITATI pingatis.

220163 17

PANE

PANEGYRICVS.

CRedo ego nullius desiderij tantas fuisse angustias, ut unicâ latissimi illius diei præsentia expleri potuerit, quo Polona ac Litwana Maestas in sacrum D. CASIMIRI Triumphum conspirauit: illa enim ipsa augusta Pompe magnitudo, dum attonitos diu præteruehere-
tur oculos, per partesq̃ iret, ita distrahebat cogitationem, ut neque in primo apparatu harere, illecta sequentis pulchritudine; neque in sequenti, primis spectandi illecebris reuocata, posset consistere. ita fiebat, ut dispersus in singula, nullibi integer esset animus, multaq̃ amitteret gaudio & admiratione. Quàm enim capax illud pectus fuisset, quod de aspectu instabili totam amplecteretur letitiam, aut ex ingenti operum exhibitione vniuersam oculis colligeret hilaritatem? Quis potius ex varietate dubitationem, animiq̃ sibi minime fidentis discordiam non concepit, seq̃ ipsum non rogauit, num quæ sciret de spectaculi gloria, ab obtutu vigiliæq̃ haberet? ingens enim morandi in singulis cupiditas propè auribus insomnijsq̃ transcripserat; quidquid intuitus docuit. Quod auaris euenire solet, ut securitatem repositarum opum sæpius visu attrectent, oculorum fidem frequenti manu explorent, iteratoq̃ recursum etiam in sinu absentiam timeant: Id familiare illiserat, quos immodica letitia occupauit. Dum reficere satis felicitate non possent auidam intuendi voluntatem, celeriq̃ recessu castigatam dolerent expectationem, in ambiguo se velut post somnum deprehendebant. Quia enim curiosam diligentiam diuturnior exultationis mora non impleuit, & mutua spectantium

A 2

facun-

facundia differendo non equauit sciendi desiderium, oblectationi voluptas defuisse putabatur: Non erat certe res modici temporis, in longissima fori area supplicem Regni totius virtutem suspicere, Romanisq̃ equare aut preferre triumphis obsequij impensi decus. Quis dies finiisset ULADISLAI Regis admirationem, qui in illa pompe gloria, quam DIVO Cognato pie prastitit, omnibus suis victorijs conspicuus incesse videbatur? Quis annus suffecisset D. CASIMIRI Principis laudibus aestimandis, aut recolendis? Nemo igitur, dum densa effusi populi obsidione premeretur, stipatosue prosequentium globos eluctaretur humeris, aut laborante in tectis vestigio penderet, ab insigni tot argumentorum stupore lassus recessit. Hesit adhuc in pectore abeuntium primus vigor, ipsa preclari officij tractatione factus cumulator, cepitque ad erudium respectare stylum, qui Regie deuotionis laborem per animos oratione circumduceret, & pulcherrimum imagine emularetur Triumphum. Quotusquisq̃ non inuocauit publicam vocem, qua ad singula laudum theatra consisteret, duraturaq̃ dictione D. CASIMIRVM ita exhiberet, ut vniuersa glorie undiq̃ collecta maiestas animis contemplantium pateret? Equidem iustissimam aestimaui fuisse postulationem: sed cum neque accuratam vires meae pollicerentur diuinarum Virtutum effigiem, neque tot nobilissimorum hominum votis a me fieri posse satis viderem, propè in commune optantium numerum concessi, nisi voluntatem alienam in modum legis communis religio ostendisset. Aderat interea & altior vis, qua in hoc cogitationum astu ancipitem timentis audentisq̃ temeritatem promissione virium correxit. Tunc statim primam deterioris successus formidinem diuino hoc impetu regere capi, & honorem verborum ad tantum sacrificium a pietate sperare.

Tunc

Tunc se se agmine ingenti commendabant præclarissima rerum specus, remotæq; ætates recenti imagine oblucebant, & exigere videbantur, ut ne ea quidem neglegerem, quæ Maiorum Virtus posteris laborasset.

Admisi itaque opportuna festinatione ad D. CASIMIRI laudationem Prosperum Cesarinum COLUMNAM, qui per altissimis Romanarum dignitatum titulos, sanguinem ad se derivatum nostrarum partium securitate servavit. Quanta ex eo in D. CASIMIRI originem derivari possent, si veterum amor eadem libris credidisset, quæ animis inscribebat? At enim, dum ætas illa styli peritè tractandi rudis memoriæ fideret, sensim insidijs obliuionis patuit. Ut omnia ex prudentia & imitatione Maiorum agerent, res præclaræ gestas memorabant: annorum interea seriem, & quidquid plena petit historiæ notitia, intentus in bella animus deposuit. Credebant seculorum cursu perire non posse, quidquid Columnis Virtus incidisset. Habeant ergo gratiam errori temporum Attyla, Nero, Julius Cesar, quorum Tyrannidem gloria Prosperi Cesarini reddidit felicem. Dum enim ambigimus, cuius insolentia tanto Principi industriam vitæ in tuto ponendæ suaserit, nostro bono iniuriam probamus. Vitari ceriè debuit furor Attyla, qui se terrifico nomine Flagellum dici voluit, nè infami manu ingenuum corpus violaret. Neronis quoque pestilenti conspectu abire ad libertatem pertinebat, quod tunc in illo Orbis monstro fortuna Regem cum Regulo confudisset, ut neminem sine veneni periculo aspiceret, quem ad salutem Patriæ putaret vivere. Plures tamen in Pompeij cladem referunt discessum. Illi Imperatori ductor militum erat contra publicum hostem, penèq; Romanum obiuerat imperium bello & victorijs: sed cum aliquando extrema calamitas afflixisset successum, Patriam,

B

pro

pro qua diu multumq; dimicarat, iam non suam, nec eandem deseruit. Non putauit liberalis esse ingenij imitari Ciceronem, qui eloquentiam ante pedes Victoris exarmauit: aut Brutum, Cassiumue, quorum generosus animus ad libertatem repetendam sub adulatione diu seruiuit. Turpe enim erat aperto pectori mendacium amicitiae alere ad irascendi opportunitatem. Cur & illum sequeretur, qui Philosophico vite contemptu, ausus in se facinus hostile, magis Porcius fuisse apparuit, dum in cruore suo volutaretur, quam Cato, dum ferro sponte incumberet? Ab hac pauida audacia reuocauit mentem imperterritam prudens cogitatio, Cesarinum stare non posse, qui tam abiecti Cesarianus iacere vellet. Duas igitur res dignissimas perfecit, cum & sanguinem ad posterorum gloriam in superstiti corpore conseruauit, & alibi liberam sibi erexit Patriam. Nauigantem Dubissa fluuius camporum amenitate inuitauit ad iura hospitij, & postea retinuit. Inciderat in gentem comem ac mansuetam, quae virtutem adorare sciebat, & nomen Italiae, quod Romana dissidia, propè expulerant, poterat suscipere. Eandem suae potentiae sedem diu retinuerunt posteri, & velut circa matrem haeabant, donec Vitenes in Lituaniam protulit Imperium. Ab eo per Gediminum Olgerdumq; Heroës Ducesq; fortissimos ad Jagellonem gloria peruenit: qui ipse quidem in Regnum Polonum primus assurrexit; stirpem deinde suam inter Coronas Sarmaticas, Vngaricas, Bohemicas circumtulit, & summorum Imperatorum Regumq; solia affinitate colligauit. Quod si ea felicitas Prospero Columna contigisset, quam Aeneas Sibylla exhibuit, ut longam Nepotum seriem praeuideret; quanta gaudia pectus illud omnis spei plenum inundauiſſent? quanta seges letitiae se obtulisset cogitationem in venientia saecula proijcienti.

Occur-

Occurrissent nouem ex Nepotibus nati Reges, plures ex Neptibus, durante adhuc salutari ad hereditatem suffragiaq; Regnorum fecunditate. Vidisset Ducum purpuras, fasces omnium dignitatum, sacros honores, fortunam deniq; in sua domo consedissee fuisse admiratus, ut potissima Reip: Christiane stemmata sanguinis sui commercio coniungeret, Orbemq; terrarum felicitate impleret. Erexissent faciem puluere sordidam prouincie fortunatis subiugata prelijs, letis victoriae clamoribus assonuisent, longis graues spolijs Triumpho assurrexissent. Quam attonito vultu stetit ad Casimiri Regis Poloniae, & Elisabethae Austriacae felix connubium, coalescentem in unum fœdus geminorum decorum amplitudinem, implexam Caesarum stirpi Jagelloniam gloriam, natali D. CASIMIRI die fecundam sanctitatem!

Sed cetera fida rerum custos posteritas mirabitur, & ex grata conscientie fide recitabit: mihi iam, quoniam deliberato per longinqua errore in portum incidi, augustus D. CASIMIRI splendor oculos prestrinxit, omnemq; circum allucentem ab ultima repetita Familiae origine claritatem ostendit, ut ex tantis nominibus ipsum magnopere, tanta tamen terrarum pignora magis ex ipso aestimem. Fuisse enim hæc magni generis iactura maximis altior damnis, nisi hunc pulcherrima laudis gradum ex publica sanctitate ad suum fastigium haberet. Longis Principum successibus metimur nobilitatem, per stabiles rerum gestarum excursus, peruenimus ad nominis opinionem, incrementa ducimus ex semel inceptorum successuum constantia: at virtutum maturitatem ex celesti honore colligere licet: quem quisquis domi suae habet, altissimo famæ impetu terras euasit. Quid enim eâ commendatione sublimius cogitari potest, quæ infra magnitudinem

dinem suam habet id omne, quod in Regnorum laudibus supremum est? Progrediatur sanè admiratio in solia ac coronas, nondum ad sacram vere nobilitatis arcem accessit. Laboret eloquentia in gestorum ingenium celebritate: altitudinis apicem non transcendit. Pendeant ingenia erudito studio ad numerosam imperiorum possessionem: non plus fulgoris colligent, quam terrarum lux patietur: adeò scilicet Imperatricis huius Familiae magnitudo omnem celsitudinem pro limine habet, ut nisi cælum conscendatur, ad humanarum laudum metas omnis iaceat laudatio. Egregiè igitur gloriam illustri serie ad se derivatam pensavit auxilium CASIMIRVS, quando Virtutum suarum conditione, in Jagellonia domo Orbem terrarum in gentibus posuit ad venerationem. Non illa proinde opus habet origines suas Deorum sanguini inuoluere, & à fabulis (quod antiquitas fecit) diuinas rapere cognationes: plus est publica consecrationis plausu domesticam calis misisse ad decus ornatumq; dignitatem. Merito itaque in Fastis Jagellonica felicitatis dies ille clariùs copiosiusq; lucet, qui tam præclari sideris exortu omnem vetusta stirpis ordinem illustrauit, caelestibusq; miscuit splendoribus. Certè oraculi instar publica fides accepit, eum, qui in nascentes tempus incidit, lætitiæ consensum. & beatam ex paternis successibus festiuitatem: quasi iam tunc vniuersa rerum Natura communi prouinciarum hilaritate arrideret, suumq; bonum interpretari videretur. Cum enim ad ortum illius ingenti strage debellati Prussi ceciderunt, & arx Papouia viribus Polonis cessit, quid aliud Fortuna voluit, quam ut latus victorijs natum saluaret, venienti q; frontes etiam hostium ac muros inclinaret? Quid & legatio Georgij Podiebradij Bohemorum Regis aliud effecit, cum Regni Bohemici insignia Patri offerret, efflagitaretq; amicitiam: nisi

nisi ut prosperrimam lucem unanimi Regnorum in plausum conſpiratione conſecraret? Quod ſi Infanti ſupremum illum rerum moderatorem DEVM indulſiſſe dixerō, ut hac ſecum aſſerret auſpicia, erigeretq̃ ſtatim Patri trophea, nemo me iure damnauerit. Nam quemadmodum inuſitatum non eſt, naturam ſlorentibus placidisq̃ euentibus origini alludere: ita ventura laudis imaginem à quopiam importari in terras, nouum cenſeri non debet. Iactent ſanè nobiles Thebe primam alumni ſui Herculis induſtriam, cū infantili manu ferociam ſerpentum in cunis preſocauit. D. CASIMIRI naſcentis felicitas victoriam Reip. laborauit. Loquatur Seleucum anchora, quam innato artificio inſculptam coxæ habuit. nos Bohemicam coronam ſceptrumq̃ in ortu D. CASIMIRI conſpeximus. Non inuidemus Zoroaſtri riſum, quem natus uſitatis humano generi lacrymis ſubſtituit. plus eſt Poloniam, pulcherrimis inuitatam operibus, in hanc lucem prodeunti D. CASIMIRO, hilari vultu auguſtâq̃ fronte accuriſſe, quod nouâ fecunditate ſuperbior, cæteris prouincijs primo ſinu Principem natum præripiſſet. Pulchrum enimvero accepit hoſpitium Cracouiâ, Urbium Matrem, Arcem literarum, Regum ſedem, ut ſciremus iam tum loci ſuffragium in auſpicijs fuiſſe. Qui tantus erat futurus, debuit ſtatim in eminentiſſima Regni ſede conſpici, inter diademata apparere, eruditis Muſarum manibus tractari. Tali ille tantoq̃ apparatu exceptus eſt, ut ad perennitatis curſum ſtatim in ipſo ingreſſu optimè inſtructus eſſet: ſed erectus ad maiora animus, quamprimum habile ad humanas rationes ſequendas naſtus eſt corpus, ſuo cepit gloriam calculo computare, & cenſu Natura Fortuneq̃ diues in curam potioris boni incubuit. Quid me igitur neceſſe eſt illis commemorandis inſiſtere? cur

C

in

in Stirpe, Parentibus, Patriaq, alienis ad laudem
presidijs, diutiùs haream, & oblatum ultro summa
prosperitatis verticem contumaci itinere premam, cum
ameniora alia plura se offerant cacumina, quibus at-
tollì pulchriùs liceat? Magnum quidem est æquabilem
seculorum in honoribus currentium terrorem excipere.
sed maius non degeneri conatu moras annorum progre-
di. Illustre virtutes in ceris ferre: illustrius vitam omni
honestâ actionum societate ita pertexere, ut sub nobili-
bus figuris natalitia claritas, velut cila, lateat, emi-
neatq, decentiùs: Eximium est in ipso Regie magnitu-
dinis domicilio nasci beatum, & fortunata lenocinia
sortis hereditate capere: plus est delicatis his obsequijs,
quibus pleriq, vitia audaciùs colligunt, ad egregia
opera venire. Præstat itaque in integro rem hanc pore-
re & quantus aureo Regalis prosapie pelago, quod tot
infestas Sirenes continet, occultat scopulos, variatur
procellis, ventorum tumultu agitur, ad virtutem
venerit, contemplari.

Et si quidem rem hanc Orbis totius suffragio desi-
nare placeret, communis omnium esset opinio, pluri-
mùm in ijs valere summam felicitatem ad sanctitatis
profectum, quos opes fastu non instant, potentia am-
plitudine non labefactat, honor maiestate non corrup-
pit, delicias non emollunt blandimentis. Producit
enim hæc omnis Regie stirpis Aula illecebras, quæ al-
tiores obtutus à Numinis, virtutisq, conspectu auerte-
re facile possunt, ut proinde affine quiddam habere
cum Babylonico calo videatur. Locus is erat subtili
ex sapphiris constructus fabrica, & ex caelesti colore,
diuinâq, præsentia nomen tantum inuenerat. Specta-
bant enim ex fornicata testudine, velut ex æthere
aurea Diorum simulachra, tantâ operæ fabrilis indu-
striâ efformata, ut materia arcanas tremenda pote-
statis

Statu notas exprimeret. Metallum contumax cesserat
artificio, ut Regem in medio confidentem ad virtutum
cultum religionemq̃ inuitaret. Nam quoties oculos in
sublime attollebat, effigies omnis venerationem metumq̃
instillabat. Quippe spirantia labor Numina sinxerat,
ut Iupiter auri fulgore ardens fulmen iacularetur, col-
linearet spectatam Apollo sagittam, Neptunus tempe-
states concitaret, Minerva terribile ferali capite scu-
tum obijceret, tam viuari omnia argumento, ut ex
aspectu formido propè manum transmitteret ad que-
rendum telum in pectore; vertigo contra turbinem ful-
crum quæreretur; rigor per corpus diffusus ab obiecto Gor-
gonis portento lapidescere timeret. Ceteri Dij suis quisq̃
affectibus insignibusq̃ carnebantur. illi ad maiestatis
opinionem formosi, hi ad letitiæ sensum hilares, alij in
clementiæ testimonium erecti. plerisq̃ vultus furore ar-
matus, frons seueritate rugosa, oculi ad scrutandum
pertinaces, manus in ictum compositæ, os in minas
conformatum. Varietas singulorum tanta tamq̃ effi-
cax, ut animus, omnibus admissis permonitionibus,
affectus in se confunderet; tristitia hilaresceret, gau-
dio mereretur, metueret spe, timore erigeretur. Omnis
hec rerum diuersitas, dum in varia distraberet, col-
ligebat animum ad reuerentiam & curam pietatis: sed
quominus se mens huic spectaculo totam daret, qua-
tuor torquille aureæ pendebant: quarum auium vis per-
magna est in beneficijs, philtrisq̃ seruire creditur. Pru-
dens enimvero opificium, & ad offensionem periculo-
rum, quibus institutio Principum facile à studio vir-
tutum abripi potest, excogitatum. Circumuolant enim
identidem Opulentia & Potestas animum, perspicua-
cemq̃ illius pupillam, Mentem, delicatis integunt alis,
nè obtutu ad cælestia euadere possit. Laborant Di-
ginitas & Voluptas admirabili varioq̃ circuitu, cogita-
tiones

tiones à Numinis contemplatione auocare. Tanta est vis in singulis, ut blanditijs incantare, ac veluti quodam fascino insitam bonitatem possint intercipere. Quisquis has amenas Virtutis moras alacri obstinatione superaret, & ad curam animiq; auxilium deflecteret, an non is ex communi gentium comitio magnus sanctusq; inter homines iret? Si eodem ordine cuncta persequar, iam profectò constabit publicam D. CASIMIRO meritò contigisse gloriam sanctitatis.

Nam primum non deerat illi ditissimus Polonia, Patrisq; Regis Pactolus, ex quo aureos riuos in splendorem suæ dignitatis, aut licentiæ ostentationem derivare potuisset. Scimus quantum excellens conditio exigat, aut iuuenilis ætas sibi arroget. Illa magnificis impendijs conquirat auctoritatem, pretioso thesaurorum damno famam lucratur, liberali erogatione potentiam conseruat, deniq; in admiratione ac obsequijs tantò retinet magis, quantò altiùs in fundum arcæ manus veniunt: hæc ipsam quoque necessitatem sepe in ambitionem exitiumq; virtutis expendit. Ea, de causa magis miramur Regiam Diui CASIMIRI indolem in tam precipiti annorum flexu, & præpotenti fortuna, nec nobilissimo suo statui dedisse cæterorum Principum consuetudinem, nec lubricæ ætatis parte in insidias feruidioris Naturæ cecidisse. Non enim ille insano luxu corpus operiebat, non lapideis flammis accendebat tunicam, non tenero figurarum textu, ludentisue artis commento emolliebat sericum. Satis potuit nosci Principis honor ex generoso contemptu, nec indigebat solenni colore maiestas, quam demissio à cæteris discernebat. Latere in vulgo non potuit, quòd eum ornamentorum neglectus ed pulchrius comeret, quòd plura deerant. Cur enim in nimio membrorum cultu laboraret is, qui sciebat omnem vestium apparatus pretiosam esse necessitatem?

tatem? Cur sinceritatem natura luxu contaminaret, dissimilemque animo effigiem circumferret? Hac autem prudenti viuendi destinatione prouidit modestie sue securitatem, quam saepe ex ornatu ameniore arrogantia inuadit, & malè intra grauitatem tuetur. Conformat se facile mens amictui, & ex colore affectum rapit, ut sub purpura minores erubescat, in argento ad obscurioris sortis aspectum palleat, ex auro seuitiam terroremque loquatur. Neque verò hæc à me dicuntur in eos, quibus fortuna illecebras natura concessit ad honoris reuerentiam. Quidam enim ad illustrem vestium splendorem publico officio dignitateque eunt, eos nemo merito arguat. Plerosque fastus ad immodicos sumptus ducit, quod quis probet? Vtrumque D. CASIMIRVS eo spectauit temperamento, ut magnitudinem excelsi nominis sub moderatione retineret, & obtentu honoris ad licentiam non progrederetur. Nihil erat in eo nimium: multa infra Regium modum. Nemo tamen quidquam desiderare poterat, quod raro exemplo ex priuato Principem indueret, & maiestate, velut calor lecti, inter oculos ciuium ipsam demissione amabilior versaretur. Fiebat proinde, ut quoties se in conspectum daret, nulli per apparatus superbie, insolentie tumultum eluctandum esset ad oris notitiam. Temperatus habitus transmutebat oculos facile ad Virtutum choragium, sine quo nunquam processit. Et erat viique, quod sub modico cultu spectari poterat, pia grauitas, verecunda letitia, comitas plena pudoris, pluresque præclari animi dotes suis signis in vultum corporisque motus expositæ. Laborauerit ille sanè industriam moderatione ornatum mentis interiorem tegere, occultaque pietatis artificia fronte sue fortune obscurare: tantum tamen in his latebris firmitatis non erat, quin ipsam compressione Virtus altius emicaret. Quis nesciuit sub

D

mode-

modestia purpure (sape enim ex dignitate habitum sumere fuit necesse) asperitatem, hirsuta nodosq; tela, & textum villorum arctè corpori insedisse? Laudabilis profectò scena, & pie simulationis recessus. Potuit in theatro nobili principalis authoritas dissimili imagine conspici, in persona amplitudine ostentare speciem, amor vilitatis, splendor abscondere membrorum molestiam. Talem vestium discordiam hoc ille federe coniunxerat, ut quasi præ vestibulo ciliij ageret excubias Regalis indumenti moderatio, doloriq; seruiret. Neque enim dubium fuit, potius illud fuisse, quod cordi adhaerebat: hoc alienum dici poterat, quod quasi eiectum & exul foris esset. Illud præterea Principis sugebat sanguinem ac sudorem, gemina tinctura optime pretia, quibus nulla maria conchylijs responderet. Quidni ergo laudem consilium, quod diuitias in luxum, studiumq; affectata pulchritudinis non prodegerit, satis de se opulentus? Quidquid corpori aliunde aduenit, spoliū est, & alienae formae praeda, suo fulgere magnificum est. Et graue quidem est hoc genus impensarum, ad viriumq; debilitatem ac languorem saepe peruenit: sed nobilior euadit purpura, quò maiore tolerantia clarissimus succus exprimitur. Alij liquores tantum habent aestimationis, quantum raritas, aut humane artis ratio permittit; hic ex Domini cruciatu decus accipit, quem necesse est esse maximum, quoties à molli educatione suscipitur. DIL O prouide CASIMIRO nihil accidere poterat, quod non magnopere profuisset ad patientiam. Siue enim viliora elegit in usum, duritie ledebant teneritudinem; siue delicatiora, mollitie vulnerabant animum in aspera propendentem. Aestimetur hinc quisq; pij Principis ingenium, qui oblectationes voluit esse suppliciorum instrumenta; nec alias ex ijs conquisiuit delicias, quàm dolorum.

lorum. Miretur & pietatem, quâ omnem opum afflu-
 entiam propè cum absentia composuit, quando sese
 ad experientiam egestatis damnavit. Quem enim non
 tangit pedum nuditas, quâ statis temporibus ades sa-
 cras adibat? Quo ille tulisset animo venientem a ca-
 su, aut origine inopiam, qui extremam sortem sibi
 in palatio fecit. Quâ mente erat erga diuitias, qua-
 rum usum à contubernio dignitatis relegavit, piâ ausus
 dignari invidiâ in calamitosâ paupertatem? Nihil
 illum commovebat infericr in exquisita in ornando so-
 llicitudo, nihil questus elegantie tumor. Cum alij fla-
 ui incessus serenitate auram accenderent, intra serici
 auro fluentis vincula v brarent gressus, argenteis cla-
 vis substrata marmora excitarent in plausum: ille va-
 cuo simpliciq; pede ad aras viam imbat. Cum ita in-
 iurijs amoreq; inopie inter opes ditesceret, admisit præ-
 terea in triclinium fænem & sitim; &, quia inter-
 dum necesse erat sanitati consulere, mediocritatem.
 Rari profectò hi sunt facultatum amplarum hospites
 in palatijs. sed mirabiliores, quoties inveniuntur, quàm
 in casis. Multum enim interest, num sponte quis, an
 necessitate toleret? Plurimis licet esse famelicis, cum
 interim cupiditate sint saturi: at inter irritamenta,
 gule, animo adimere ciborum licentiam, quantarum
 est virium? Arcana fabularum veritas, cum Tantali
 penas loquitur, autumnum pomis instructum circum
 os suspendit, tam attentis ad fugam frondibus, ut
 præter umbram cedentium fructuum nihil manibus as-
 sequatur, aut dentibus alliger: addit & fontes labijs
 alludentes, ita mirâ vicissitudine quietos rapidosq;, ut
 morentur sub mento ad fallendum, sterili mox vado
 deficient, quamprimum in haustum palmas compres-
 serit. Ille tamen perpetuâ delusus laboris sui sterili-
 tate, in prædam semper est intentus, & irritas manus

in spem continuam exercet. Tanta scilicet vis est presentia, ut famem exstimulet, & ne ipsa quidem desperatione totam extinguere possit expectationem. Magnum igitur erat in D. Principe voluntatis supplicium, dum, copioso inuitante ad palati obsequium, lenocinio, sibi ipse indixit continentiam. Nihil ille in omni ferculorum varietate sibi dissimile admisit: nihil ex diuite delicatoque epulo prater victoriam sui delibauit. Quoties extendisset manum, eo id faciebat animo, ut cupiditati negaret, & se torqueret non admissa voluptatis usu.

Non minor dimicatio facienda fuit cum opibus, que prodigalitate petebant effundi. At ille, cum nosset immodicis impensis saepe non dignitatem defendi, sed vitia nutriri, viresque corporis ad consuetudinem licentiae crescere, reperit homines penuriam pressos, quibus diues lautusque esset. Hos copiosam recipere manu, veste instruere, prouidis leuare subsidijs, adeoque suis praeponere solebat commodis, ut laborare videretur, quam ratione ipse in Regia omnium rerum ubertate miser esset, illis Principem se exhiberet. Praesens erat implorantibus, nec aliter se negare poterat votis afflictorum, quam perennes fontium vena ijs, qui humili inclinatione undas hauriunt, quasi prius peterent: in hoc vero etiam superior, quod saepe in sinum depressorum, una liberalitatis scaturigine, infuderit duraturum in omnem aetatem beneficium, unicoque haustu vite totius sitim restinxerit. Audiuimus quidem fontes quosdam auro fluere: at obicem accedentibus auaritia opposuit. alios miris scaturire aquis: sed ad strepitum pedum velut exterritas fugere: plerosque medicis bullire fluctibus: verum pretio aditum emi, nec omnibus exsugendis morbis sufficere. Hic vero, quam presenti manauit ope! Neminem palatij reuerentia, pertinaces custodum

Adum excubie, armatum Satellitum. submouebat. Habere ab eo licebat aurum contra egestatem, in patrocinium vocem, manum in lapsu. Fiebat proinde ut egenorum examina obsiderent euntem, vidus non aliter, quam Ægyptus suum amnem inuolarent, pul-lata reorum turba circumstaret. Pulcherrimus enim-vero comitatus & suâ indigentia purpuris omnibus for-mosior, aut potius ad expugnandum celum collectus exercitus, cui misericordia Imperatorem præsicit, ut det stipendium, quasi egestate militaret, vinceretq.

Hæc iuste laudationis occasio facit, ut quoniam de diuitiarum usu multa attuli, Potentie saltem dispen-sationem parcius in tanta dicendi copia prædicem. Nemini enim dubium est plurimum eum potuisse, qui Patris leges per ætatis prerogatiuam exire noluit, ut vres in integro iuris paterni nomine conseruaret. Sub-iectio, dum filium quasi in corpore adhuc retinet, vi-rum communionem non diuidit. Cæteris licet manus Regum meritis aut impetratione inuadere: Filij l. gi-bus & sanguine satis sunt instructi, ut ad obtinen-dum, quidquid equitas docet, consilium ab illis ve-niat, quasi à Patris ratione, preces quasi à Natura. Leue certè esset, & hominum consuetudini dissonum, v-riusq; facultatem velut calculos, numero discernere. Communis enim illis opinio plus penè tribuit, quam Na-tura. Hæc, quos subiectione iurisq; rigore coniunxit, dissociavit corporibus: illa etiam corpora authoritate copulauit, & anime vnius colligauit arbitrio. Licuit nonneminis varijs inspectis Reip. muneribus, Regem formare instruereq; ex subditis: Præfectos in oculorum vicem transferre, aures appellare Iudices, Senatui cor-dis motum credere, militibus manuum, pedum agri-colis dare officium. soli Filio concessum est Animum Spiritumq; Patris dici, quod Patrem ex facili moueat,
E sen-

sensibusq; & membris Reip. coniunctâ facultate utatur. Valuit igitur D. CASIMIRVS paternâ plurimum potestate, quam ille in sanctâ custodiam fidei, & nouâ ruinam religionis deriuauit. Tum enim demum, se fortem pollentemq; viribus existimauit futurum, si constanti lege incorruptam veritatem exitio dissidentis sectæ tueretur. Amamus igitur vocem Filij in Priuilegio Patris: miramur pietatis ingenium in sublimi patrocinio: suspicimus fortitudinem quâ totius Græci schismatis manus ita arctè ligauit constrinxitq;, ut eas neq; in nouorum structuram templorum erigere, neq; in veterum restorationem commouere possit. Quid hoc edicto preclarius, quo ad fallacium in fide opinionum perniciem, ius dedit annis, elementa vicesq; temporum armauit? quo omnem discordis pietatis solertiam in otium languoremq; composuit, in obliuionem deinde abituram delubrorum occasu? Ita enim citius animorum dissidia suorum cineribus templorum sepelirentur, iacerentq;, quibus fulciendis liberalitas non occurreret, promouendis locum non inueniret conspiratio, industria iuuandis adesse non posset. An non hac præterea voce Naturam humanorum seruitute vitiorum emancipauit, nè aduersus DEVM faceret contumacia præsidium? Tunc vniuersus rerum ordo sibi redditus videbatur, cum arbores in fulera vetitarum adium non crescerent, in compagem sectarum saxa non coalescerent, terra ad firmitatem tutelamq; ignorantie non solidaretur, nihil denique esset, quod spe aut vi ad pertinaciam erigendam valeret. Hæc fuit rerum à DEO productarum restituta felicitas, quod punire possent, iuuare non cogerentur: quod contra fulmineos ignes nihil auderet, ullus humor, nihil aduersus pluuiosa nubium supplicia rectorum circuitus, nihil contra infortunia ingenium. Ipse quoque animus velut

in carcerem compactus, suisq̃ tacitis sensibus inclusus
in otioso corpore hærebat, quod ei in publicum exire
membrorum ministerio non liceret. Victa erat hac lege
errandi licentia, poteratq̃ decepta pietatis damno ve-
nire ad primordia veritatis. Quia enim antea in her-
ba semen malitiæ serpentis oppressum non est, quid
restabat, nisi ut vitiosa segetis maturitas sensim tabe-
sceret vetustate, & fatalem messem extremâ clade fa-
ceret? Hæc specimen & exemplar erat in D. CASI-
MIRO verè in religionem propensionis, lentis reme-
dijs vires infestas affligere, & quasi contagio rem ru-
iginemq̃ immittere, ut morâ ad ruinam celerius per-
duceret. Fuit id & exempli rari, ita actionum cur-
sum disponere, ut etiam post fata continuaretur, &
absens legislator viuentis præsentia legis in abolendis
fidei impedimentis laboraret. Detrahit operi constan-
tiam, quisquis ultra vitam, suam alienis manibus
robur non relinquit. At qui posteros ad perpetuam
virtutis agitationem instruxit, egregiè prouidit post-
humam quiescenti suo labori propagationem. Ita ergo
ille voluit ex hac statione decedere, ut tamen vox co-
hortatioq̃ ad religionis curam stabilibus repetita incre-
mentis superesset, & ingenuis pectoribus allisa, ex ap-
probatione resuluq̃ se intenderet. Sciuerat eam de-
mum vitam optimè in terris relinqui, quæ non aliter
à negotijs amoueretur, quàm manus ab horologio. Ut
enim illâ absente mobiles spiras indefessa machinarum
vertigo ponderibus rotat, & malleolum indicemq̃ in
motum animat, ut temporum momenta voce silentioq̃
loquatur: ita edicta continuatis mortem pensant ne-
gotijs, postquam subditorum animos semel ad peren-
nem religionis progressum abduxerunt. Tales etiam,
dum more cæterorum hominum sub terram eunt, inof-
fenso

senso potestatis cursu viuunt, & legem in solio ad compensationem presentie habent.

Èò cùm perueni, prauertendum esse existimaui ad honorem Regium, quem conueniens potentie usus sibi iure vendicat. Tantus enim iam erat D. CASIMIRVS vt sub Patris tutela dignus imperio esset. Animos etiam omnium in desiderium excitauerat, vt licet pios optimi Regis mores felicitatemq; suo abesse regimine nollent, votis tamen in filium excurrerent, & estimatione coronarent. Atque ita sub superstite fortuna & desiderio Patris iudicium habuit supreme dignitatis, & intra optatam paternae presentie gloriam Rex erat animorum. Eadem opinio vicinos populos occupauit. Nemo fuit, qui ex diuini animi notis, & minime otiose indolis sp̃ crimine dignam summo apice vitam non preciperet. Ungaria tamen ceteros praeiuit suffragio, & campum tantis virtutibus praesternere ausa, occasionem vacui solij in gloriam D. CASIMIRI rapuit. Amplissima eo nomine missa legatio ostendit communem Senatus vocem, equestris ordinis vota, supplices populorum manus, quibus à Patre Filium, Principem à Rep: a CASIMIRO imperij curam petebant. Et verò allucere poterat eximia Regni pietas, religionis amor, militaris rigor discipline, & preparatus quidam ipsi suscipiendo omnium virtutum concentus. Poterat expugnare praclarum imperandi inuitamentum, opulencia terre, in quam impensius excolendam meliori pollice incubuit rerum molitor DEVS, vt sedem voluptatum in ea diuitiarumq; collocaret. Nihil huic vnquam affinxit fabulosa vetustas, nè incredibili argumento verum Nature luxuriantis opus male commendaret. Non hic Tagum aureis manantem arenulis, aut collucentibus procellosum unionibus Gangem posuit, vt solidum tutioremq; auri prouentum
in

in terris indicaret : non pretioso vellere radiantem arietem Thebarum, aut ovis aureis fecundam Æsopi alitem, nè per vanos interpretum sensus malè aurum attonderetur, excipereturq̃. Alibi mendacijs inuolutæ laudabantur facultates : hic veritas semper diuitijs præfuit. Assurrexit proinde aurifero Ungariæ Imperio Europa vniuersa, & seipsam contemplata variarum opum vbertate diuitem, postquam suas singulis prouincijs tribuit felicitatis prerogatiuas, Ungariam, Pomum aureum, appellauit : sed quod iam inter plures proiectum à Fortuna, lusu bellico dispares manus discerpserunt. Neque sic tamen suam amisit amanitatem, cum diuisit gloriam. Vbiq̃ rubet adhuc, augente natiuam purpuram alieno in æstimationem, fuso sanguine, & prima vulnera unguesq̃ impressos potentia partium protegente. Vt illud totum acciperet, Ungarorum lege pulcherrimus aptissimusq̃ D. CASIMIRVS est iudicatus. At ille manum ambitioni subtraxit, quòd sub onere pretioso pietatem suam vilesceere posse existimaret. Attentus in salutis sue curam animus, quoniam omnem seruitij nobilioris querebat opportunitatem, & acutâ acie moras imitationis diuine perspiciebat, nasci ad Regna satis esse ratus, celesti sp̃ei suam consecrauit dignitatem. Vt quid in oblatam rerum omnium affluentiam concederet, qui paupertatem iam inter ingentes Regie domus opes admauerat ? cur sub diadema iret, qui pridem rerum contemptu honorauerat cogitationes ? aut sceptro tenendo dextram porrigeret, quam proijciendo auro exercuit ? An enim ad diuini conscientiam arcani non pertinebat se Regnis non induere, qui Mundum exuerat ? Fuere potentissimi Principes, qui dum sue anime gubernacula tractare vellent, fessamq̃ imperando etatem, velut in portu colligere, ad priuata vite angustias

gustias confugerunt: ille ante tempestates cursu absti-
nuit, quod laudabilius esse iudicaret honores fugere
ex destinatione, quam experientiâ difficultatum con-
nitente, Regio se officio eijcere. Quamquam & illa
mens paucis contigit. Quidam enim, dum in largos
annos spem vitæ proijcerent, in honore publici laboris
sunt deprehensi: alios potentia non dimisit: plerique
amor salutis communis periculis illigatos retinuit: non-
nulli constantiam diuerso virtutis flexu corrumpere
non sunt ausi. Ille venturas in flore moras precidit,
ne, si atates singulas diuersis gradibus ad maturita-
tem diueret, agrè sederet in proposito. Et vidit ille
quidem D. Stephanum sub corona Vngarica magnum
sanctitatis culmen attingisse, sibi tamen metuebat, ne
si abundaret fortuna, virtutis accessione indigeret.
Idcirco maluit ne dignatione quidem solari petentis
Vngaria studia, quam prima sui progressus in bono
vestigia dissimili passî confundere, aut proseguere. Ita
abire Nunciij coacti, solliciti magis, quod tantam vir-
tutem in solum, quam quod suæ gentis regimen non
impetrassent: ille securior non admissio principatu fa-
ctus, gaudebat unâ abiectiōe damnatam omnem bea-
tam felicium vim, & suffecisse sibi ad victoriam, no-
luisse. Alijs videbatur amplissimum quidpiam ade-
ptus, quod æstimationem digni imperio animi, Le-
gati secum non sine merore exportassent: ipse sibi fa-
licissimus visus, quod excelsam stationem in mate-
riam negligendi accepisset. Tum enim se didicit, non
à voluntate sola testimonium habere magni ab omni
sublimitate horroris, quando non admisit, quod in-
genti commendatione in animum influebat. Orbis quo-
que terrarum, quamuis sciret eum meruisse in alio
proponi, nesciisset, quâ propensione in adipiscenda
esset, nisi adepta detrectaret. Melius iam liquet
magni-

magnifica mens aspernantis, cum confuzientem sinu excussit honorem, ruentiq; in humeros Imperio Atlas esse noluit. Nempe suscipiendis terris locum non inueniebat, qui augustum calorum pondas plenis manibus ferendum admiserat.

Et ego quidem dum hec cogitatione amplector, merito tanta virtuti adstupesco; neque paterer me inde transferri, nisi alia se offerrent, que multiplicem astimati operis ubertatem magnitudine nouâ conuincerent. Sic enim sanè, ut quidem maximè est eximium, & singulare, Regij animi decus, quemuis dignitatus fulgorem otioso praterire oculo: maius tamen semper existimatum est, sic omnem aetatem, quâdam seueritate temperare, ut nullis delicijs deprauata, pudori integra sinceraq; seruetur. Quemadmodum cauti admodum & prudentis est diri, euadere rectas inimicitias, que vultu amicitie pugnant: ita, quisquis nature adulantis insidijs, gratoq; indulgentie veneno non patuit, eum ego humanâ alioiorem conditione esse existimo. Quò magis D. CASIMIRI par est suspicere victoriam, qui per blandimenta vitiorum, libidinumq; faces illeso pede incessit, nullis unquam laudatis malis, que illecebris in perniciem armantur. Si quid accidit inopinatum, quod faciem recti induisset, ex ipsa scena agnoscebat dolum, & robusto metu inuadebat hostem, ut fugâ vinceret. Neque enim securum esse putabat lubricam aetatem delicato committere commercio, & cum iucundis periculis coram agere. Vt nihil aliud efficiant, moram lenti certaminis ad vincendum instigant, successumq; sperant, quamdiu presentiam victoris adhuc stare in ictum vident. Quamquam amena hec vis voluptatis, quantumuis diuturnitati fideret, actum hic egisset. An enim eum molli fregisset habitu, quem celestia solatia ad obsistendum durauerunt, & cui ad

victoriam satis fuit, semel rigidum vultum opposuisse? Ut interim taceam, diuini eum animi ductu, aspero semper calle ad decus iuisse, nè, si ancipiti dubioq; itinere pergeret, obuiam pro ratione haberet libidinem. Quis eum aliquando conspexit leuibus puluibus, aut sanitatem excepisse, aut molliuisse delicias? nisi fortè cum premere vellet alienos oculos in vite communis opinionem; Et luce quidem celaret vsitatam viuendi asperitatem, tenebris autem duceretur ad corpus in arduo reuocandum. Tam illustri tamen exercitio caligo omnis depulsa, nihil poterat aduersus curiosam multorum pietatem, quominus admiratione Principem obseruarent. Habet hoc omnis virtus, ut communi oberrare vultu, turba se immiscere, vulgari habitu speciem suam componere non possit, quin pleriq; immigrarent in recessus, Et suis illam tenebris astiment. Citius tamen intentus animus alienam in Principibus agnoscit personam, Et in fame honore ac theatro ponit actus, quos pio conscientie secreto texerunt. Vt umbra magnitudo prodit molem corporis: ita virtutis maiestatem quaesita lucis absentia. Fuerunt igitur, qui asseuerare non dubitarent, D. CASIMIRVM, cum iam altum noctis silentium testes oculos submouisse videretur, in nudam secessisse humum, nè minus tractata consuetudo transilire aliquando atque effugere honestatem posset. Tunc è cecis ad templa pergere vestigijs, seq; ad sacras fores proijcere acceperat in morem, Et in iza loco felicitatis ducere si contingeret, aut excussum deuotis euntium pedibus puluerem osculo exciperet. Quale verò erat Et illud spectaculum, cum teneram obsequentemq; carnem flagri violentiâ compelleret ad voluptatum negligentiam! crebris ictibus vulnera aperiret dolorum ingressui! molliores corporis partes liuore obduceret! Ad tam heroici operis praesentiam

tiam latebris euoluendam, dies, credo, ipse properasset, si sensum habuisset pietatis. tenebrae interim sanguine excusso erubesciebant, quod aliquamdiu conderent, quod Orbis terrarum postea erat conspecturus. Licet mihi proinde noctes illas, abolito vetusto nomine, in aurora appellationem vocare, quod defusi cruoris luce purpurascerent, quasi clarissimum seculorum diem praerent predicerentque, qui tantis factis deberetur, & successit. Licebit & D. CASIMIRI stupere prudentiam, qui ut securitate perpetuam castitatis frueretur, spontaneis eam ita circumscripsit supplicijs, ut nullis delicijs pateret aditus ad religionem bonae mentis peruertendam. Ea de causa corpus obibat penis, emuniebaturque vulneribus, ne suae tanto thesauro excubiae deessent. Spinis defendendam esse rosam hanc ducebat, ut pulchrius inter stimulos vireret, puncturis in spem durationis excitaretur, horrore ipso aduersorum esset beator.

Ed porro aestimatio postea processit, ut morte vitam puritatis conseruandam putaret. Inciderat forte morbus vehementior, cuius extremum discrimen cum nullum sistere posset medicinae ingenium, Venus communi consilio sanatura credebatur. Hanc igitur Iuueni purissimo suadere ausi, ut, si necessitate ad scelus ire nollet, honestate illa vitam tueretur: geminato commodo pudorem in fecunditatem prolis & sanitatis expenderet, nec crederet florem hunc male periturum, quem Resp: in fructu, Pater in solatij maturitate, aetas in duratione esset habitura. Iniquum esset, illi, a quo in leuamentum senectutis accepisset vitam, ad luctum spontaneam orbitatem disponere, & cogere ad lacrymas spem gaudiorum. In computationem offensa venit fugisse, cum manere liceat, e viuis, telo in petus paternum ultro deiecto. Nam quod relinqui a se
G
existi-

existimaret in virtutis amore mortis excusationem, nil
hoc aliud est, quàm nolle videri ingratum, & fieri:
tollere causam dolendi, & facere. Cogitaret potius,
pulchrius esse certos honestatis tuende modos admittere
alieno arbitrio in usum, quàm suo eligere in perniciem.
Abunde pensari posse celestis consilij mutationem iustâ
conseruatione legis. non cariturum culpâ propositum,
quo virtutem iniussam ad iniuriam sui, Patri, Reip. aleret.
Sequeretur porro sui nominis Regem Polonia, qui publicæ
saluti votum laudabiliter consecrauit, eò quod vidisset
Principum virtutes esse priuatas non debere. **DEVS** bone! quantus
contra has voces surrexit! quantâ obstinatione cohortationem
precesq; repulit! Faceessant, inquit, tam suaves amici,
qui aegritudinem vocant ad voluptates, & ad incolumitatem
ducunt parricidio Castitatis. Quæ foret hæc viuendi conditio,
nobilissimum animi decus pro morbo corporis ponere? quanta
damni moles, mortis momentum redimere mansuro exitio?
quàm graue ad vitæ usum remedio venisse, quod conscientiam
electio- nis optimæ non haberet? Malè verò hoc meo facto
Patrem ducitis in merorem, cuius lætitiæ nulla unquam
pietas periculo defensa fregit. Qui me hilari vultu
aspiceret in acie fortiter pro patria mortuum, sine luctu
non spectabit pro virtute occumbentem? Habere certè
tristem de me non poterit memoriam, quoties suam in
meo decessu cogitabit institutionem. Hoc ille docuit,
hoc ego didici, magno vitæ rerumq; contemptu ire ad
curam celi, pergere in excellentem perennis dignitatis
gradum per aduersa, liberalius puriusq; in **DEVM**,
communem omnium originem, refluxere. Regni quoque
honores obijcitis? Quæ hæc est recordia, in spem
coronæ regalis diadema, mihi tollere æternum, quod
DEVS integritati decreuit? Vtinam ad Ma-
iores

iores vestros, quibus arcana celi necdum innotue-
rant, oculos referretis, eueniret mihi fortassis vestro
consilio, nè intra Vendam essem, cuius pudicitiam
Polona fortitudo suis periculis funeribusq̃ seruare vo-
luit. O vocem verè Regiam, humanisque viribus ma-
iorem! O laudabilem seruanda puritatis contuma-
ciam! Quid hac esse potuit mente fortius, quæ egregio
impetu ad vniuersæ rei dimicationem venit, & vno
ictu delicias, earumq̃ laudatrices, Naturam, Ne-
cessitatem, vitam superauit? Habeant itaque suas
sibi laudes, quicunq̃ exciderunt vultus emendatissimi
formam, mutilarum oculis euulsis naribusq̃ præfectis
pulchritudinem, sexum simulatione texerunt, ut pu-
dorem in tuto ponerent: D. CASIMIRVS patenti
campo adeptus est victoriam, dum præ voluptatis hor-
rore, & viuus integer abire maluit.

At eum nos tamen excessisse non arbitramur, quem
imitatio in animis expressit, veneratio in templis re-
liquit, patrocinijs præsentia retinuit in Regno, gloria
ubiq̃ posuit. Quanta ornamenta contemptus vite im-
pensus Castitati protulit! Cumulatè DEVS immor-
talis pensauit palatia templis, solium aris, Regnum
supplicibus Imperijs vniuersis. Omnia enim hæc conti-
gerunt, postquam miraculo vite operumq̃ attonitus
LEO X. diuinâ authoritate dignum proclamauit,
cuius Sanctitati Orbis terrarum assurgeret: cui ab
omnibus fas esset vota reddi: a quo pericula immuni-
tatem, anceps belli alea successum, tota deterioris for-
tune tempestas serenum precaretur. Erexerunt se subi-
tò ad hoc edictum omnes, & priuatam iam pridem
pectoribus inclusam pietatem palàm protulerunt.

Cùm plurima multi agerent, SIGISMUNDI
III. Regis deuotio liberalitatem omnium ac venera-
tionem toto apice excessit. Quâ enim ille impensas
G 2 fun-

fundebat copiâ, ut argenteus esset locus, qui auguste
responderet sanctitati, & nobilissimarum familiarum
lagellonia atque Austriaca decus calis insertum, ma-
gnificè in terris contineret? Quàm diuturnos artificum
labores, cursusq; annorum in festinationem sacre adis
vocauit? quorum tamen assiduitas, non tam in ma-
gnitudine moram consumpsit, quàm in rara maies-
tate loci, & inusitato materia pretio prolixam artis in-
dustriam contriuit. Quot maria nauigatione fatigata,
ut exquisita manuum doctrina in rudi impolitoq; mar-
more, nature ingenium iam inueniret? Cui enim al-
teri remotorum litorum lapis, peregrini laboris sudor
aliene felicitatis raritas deberetur, nisi illi, qui ea
prodiit stirpe, quæ terras longè latèq; diffusâ ample-
ctitur potestate? Hic esse decuit, non quasi reluctanti
rerum ordini ereptum, sed ex intimo sinu transmis-
sum, quidquid vehementi solis appulsu vstum est ad
decorem, aeterno frigore in speciem concreuit, fortuito
elementorum concursu solidam rapuit formam. Hic
par est preciosam Regnorum fecunditatem in communi
obsequiorum cumulo apparere, ubi in probatissimo vir-
tutum exemplari fulget maxima terrarum dignitas.
Stat proinde iam opus immortale, ita estimatione ma-
terie & argumenti illustre, ut quid alteri possit præ-
ferri, nesciatur, nisi quod utrumq; ad piam Authoris
liberalitatem suspiciendam animos spectatorum auocet.
Hec enim in omni illo decore pulcherrima est, & sum-
ptuosum structure valorem excedit præstant a. Hanc
omnis ille in picturam casim compositus lapis monstrat,
animata in Diuorum figuras marmora loquuntur. edes
ipsa aspici indignatur, si quispiam alios in admira-
tionem sensus afferat. Et sane, quid pulchrius hoc sa-
cro domicilio cogitetur, quod ita elegantia ubiq; per-
poliuit, & obtinuit pietas, ut propè totum aram di-
cerem.

cerem, nisi amplior maiestas, dum se superat, atque
magnitudine conuincit, discrimen faceret? Ignosce
mihi Romana eloquentia copia, si cum verborum peri-
culo in re tanta loquor, Et ita in magnis explicandis
reposito toto significationis fastigio, ut ad maiorum ex-
planationem infinitum sit, quidquid vniuersa facundia
habet primarium. Neque enim facile est unam duendi
facultatem inter egregia prestantissimorum Regum
duorum, SIGISMUNDI ET VLADISLAI
facta ita partiri, ut utriusque se exaequet munificentia
aut pietati. Dum moror in uno, dum ad alterum pro-
pero, illum moram non exprimo, hunc festinatione non
assequor. Adeo amplitudo facti variauit audaciam
tentantis omnia animi, ut cogar in diuturnitate ar-
guere properationem, Et celeritatem tarditate excusa-
re. Quis enim differat, ut Pater inceperit! ut perfe-
cerit Filius! quam equabili tenore largitas ac benefi-
centia venerit ad consummationem! Cum paris manus
molitionem intueor, prope opus in plures Authores
discerpere non auderem, nisi palam constaret, VLA-
DISLAI Regis esse perfectionem. Illi hanc gloria
partem DEVS seruauit, ut Et splendidum absolue-
ret edificium, Et sua Diuina CASIMIRI presen-
tia impleret.

Et quoniam magnarum laudum emensus Oceanum,
ostia quoque ac veluti ingressum ad alios labores euasi,
video mihi rursus immensum aliud equor nauigan-
dum. Intueor Triumphum, quo D. CASIMIRVS
in erectum suo honori Capitolium peruenit: quem
quemadmodum fragili ueham nauiculâ, aut quomodo
leui gubernaculo in portum regam, non intelligo In
tanta consilij inopia ad usitatam confugere fortassis
proderit temeritatem, Et metum Numine propitio co-
rum, quibus mea vela credidi leuare. Expediam

H

cecâ

cecâ hac ratione exitum si non integrè, (precipua enim tantum attingere est animus) certè auspiciò, quamprimum in alienam fortunam, quam aperto mari verbo, respexero. Vinam tantum mihi ingenij effiret hec felicitas, quantum omnibus, quos deuotio Vltimæ exciuit, alacritatis est elargita! Postquam enim priore loco motus est D. CASIMIRVS, ut in perpetuam dignamq; celesti Principe sedem honoratus deinde pergeret: quanta undiq; confluxit hominum multitudo, ut aut paululum morantem in primario templo obsruaret, aut deduceret procedentem! Crederes eodem furarum manuum nixu excitatos, motoq; domibus eff. ciuitatis frequentissima homines, ut dedignati commoda suorum parietum spatia, latissimas publici itineris areas tumultu venerationis angustarent. Et fuerint sanè via obstructæ: celerem tamen faciebant profectionem, cum se veluti fluctus amicâ iniuriâ ad officium promouerent. Paucus tamen contigit in eodem, postquam accesserunt, vestigio herere. Præteriuisset satis erat ad solatium difficilis via. Restabat enim spes diutius spectandi, si paribus angustijs, sed potentiori spectaculo celeste bonum urbem inuiseret. Ea res plurimis persuasit, ut priuatis impendijs latitiam communem iuuarent. Nemo igitur parcere sumptibus, aut ingenio, nemo à Maioribus transmissa ornamenta clauibus coercere. Omen erat presagiumq; mansura felicitatis, toto diuitiarum apparatu prolire, & inclyto opum obsequio securam facere fortunam.

Dies sequens ostendit omnium cogitationes. Diuus enim Princeps pretioso inclusus loculo, dum succollante nobilissimo Clero inter hilares plausus, triumphalesq; Academiæ voces, per longos platearum tractus duceretur, nihil desiderare potuit, quod pietas non contulisset ad venerationem, liberalitas ad maiestatem. Ita undi.

undique deuotus splendor Arcus erectos adesq̃ inside-
rat, ut noua Vrbs facies diem sibi ipsa ornatu mu-
sitato auget. Aulea textili auro illustrata pro fori-
bus, vela acu picta inter florum argutias pendula, o-
mnis peregrina opulencia, inq̃ suis succis attonitarum
opum industria, si quando ambitioni aut luxui pralu-
sit, hominum pensabat honore tali errorem, suamq̃
iniuriam expiabat. Diceres diuersarum ornamenta
terrarum unā conuenisse, et artis pretijq̃ certamine
cumularent oblectationem, & multiplici cultu preter-
euntem diuinum luuenem venerarentur. Sed quid ego
hec adium propē gestientium gaudia commemoro?

Erat alia longē pulchrior ad pompam materies non
impressas Deorum fabulas mentiens, aut profana ve-
terum Heroum exhibens simulachra, sed ipsius D.
CASIMIRI rebus gestis spectabilis. Quis eum &
vultu gratum, & habitu modestum, & fortunā illu-
strem ab operoso penicilli labore non accepit, ut pro
ameno domus vestibulo exponeret? cuius palatium non
occupauit effigies, quæ purpurā Principis, lilij Vir-
ginem, Diuum radijs non fateretur. Iam ipsa quoq̃
miracula plurimis vivebant in imaginibus, tam ac-
comodatā similitudine veritatis, ut ars affectibus ob-
temperaret, doctaq̃ colorum positio tabulas pijs qui-
busdam sensibus animaret. Videre erat ipsius patrio-
nio puellam à morte ad vitam remeare, non sine a-
mabili quodam horrore, quod ita in duarum rerum dis-
parium confinio idem vultus staret, ut diuersis signis
exanimis adhuc iam viuere inciperet, & iacens ca-
daveris nota in surgentis corpore summā concinnitate
conuenirent. Aderat & memorabilis ille celestis fa-
uor expressus, cū n̄ contra Moschorum perfidiam
vado securo præiuit exercitum Iuuenis candidissimus,
qui albo inuictus equo, alibi insanos elementi vorantes

tuto tramite vitauit, componente se flumine ad transfundendi fiduciam: alibi sensim conspectus ereptus, sciebatur fuisse, pictura dexteritate presentiam in absentia retinente. Et illud ad decorem pertinebat, cum in eosdem hostes confertissimos paruam Lituaniam manum duceret, & in aëre, velut de tribunali regeret: idoneo humane solertia inuento, quasi ubique numine suo adesset, & hos quidem iustâ irâ in vindictam pradarum accenderet, illos ab aduersis gladijs regeret, nullos sineret patere vulneribus, omnibus famosam eade fugâq; victoriam largiretur. Quid singula in tanta copia persequar? dicamne, quemadmodum eximia artis pietas in arcanis rerum euentibus, curationum modis, auditarum precum luserit argumentis? dicam de penicillo exiuisse in genua supplices ad petendum, ad rependendum donis beneficium hilares? oculum creuisse ceco, mersum è fundo rediisse in cymbam, ignem in incendio ad vrendum, subito fraxisse? dicam suis ipsum in omne genus hominum meritis sibi ad ornatum abundasse? Erat enim vita ipsius clarissimis virtutibus locuples, & mirandis postea operibus calisus illuminata: omniumq; ita suffecit votis, ut negotium in ea fuerit eligendi, non quidpiam desiderandi difficultas. Nec decuit aliter D. PRINCIPEM ornari, nisi ut ex ipsomet, velut ex ditissimo theatro triumpho acciperetur celebritas. Inanium est aliunde emendicatis frui honoribus: pleni de se porrigunt solennem conspectum.

Inde erat etiam, ut, cum multus & hîq; & varius fieret plausus, nullæ voces gratiùs acciperentur, quàm quas ipse Augusta Virgini concinnauit in honorem. Quidquamne dulcius esset carmine, quod an plus ex candidissimo pectore acceperit suauitatis, quàm pietatis, in dubio est? Cui pulchriùs aures accommodari
quant,

queant, quàm ubi verborum gratia per intervalla,
pari sibi occurrit gradu, quasi vocali imagine in exi-
tu repercussa concineret? ubi brevis interstitio cadendi
equalitatem suspendit, ut mora in similem modum,
iucundius conveniat? ubi erudita eloquentia alternis
claudicat versibus, & varius pedum incessus, passu
alibi diminuto, exaquo alibi iucundior facit pre-
candi voluptatem? Dum qualibet sententia, velut
torno excusso, limatior veniret ad vocum concordiam,
sepiusq; in orbem recurreret pijs sensibus delibuta ora-
tio, animus auscultatione colliquecebat. Quae ego
omnia cursim praetereo. Neque enim fas mihi esse vi-
deo his immorari, quando alia se offerunt magnorum
Virorum decora, qui triumphanti D. CASIMIRO
suam praebuere in obsequium dignitatem.

Erit pra oculis aeternitati MARIVS PHIL O-
NARDVS, Auenionensis Archiepiscopus, qui VR-
BANI VIII. effultam humeris Vicariam DEI in
terris potestatem ea parte, quâ Sarmaticis incumbit
Regionibus sustinet eximie. Nempe non satis existima-
bat magnificentiam faustissima diei à se illustratam,
nisi Diuo Indigeri in plausum cessisset, quidquid exi-
mijs suis factis liberalitas summorum trium Pontifi-
cum in premium contulit, & explicasset in pompa id
omne, quod Roma in augusto Christiani Imperij thea-
tro maximum elucescit. Narrabit quoque omnis etas
ABRAHAMVM WOYNAM Vilnensem
Antistitem, cuius in illo numeroso Senatus, ordi-
nisq; Sacri quâ Latini, quâ Graeci ritus federati agmi-
ne pulcherrimus emicuit splendor, & tam pium deuoti
laboris exemplum, ut ad sanctos animorum impetus
ciendos, vis ab eo atque permotio veniret. Demus sa-
nè multum privata singulorum facilitati: constat po-
tentem cohortandi humanitatem plurimum frequentia
pro

profuisse. Sensit *Lituania* ac *Russia* reuerentia plenam seduli *Praefulis* vocem, tantoq̃ cumulo ad authoritatem consurrexit inuitantis, ut, si cetera multitudo abfuisset, lectissimus *Sacerdotum* populus fecisset venerationis densitatem. Et haec erat caelestis imitatio industriae, diuino instinctu letissimas terras instruire, Et tot pectoribus esse pium, quot consultiore prudentia ad noua vota incitauit, aut uberiore affectu ad securam desideriorum impulit prosecutionem. Et quis verò ceteros enumeret, quorum sacer illustrisq̃ comitatus fecit communis letitiae accessionem? quis conspiciuos eximijs curis *Senatores*, festum *Magistratus* *Aulici* decus, splendidum libera nobilitatis progressum percenseat? sua illi se eximent obliuioni virtute, Et meo silentio culti ipsam pro se audient aeternitatis facundiam perorantem.

Tacere tamen eos non debeo, quorum gloria ubertatem dicendi ex ipsa munificentia accepit. Quis illam magnifice erectam *Casimiri Sapientiae* *Mag: Duc: Litu: Notarij* molem, quā latissimum platea ductum exornauit, suo gaudio, illius pietate calis non coniunxit? quos in triumphali ingressu, quem arte Et pretio insignem, ingenio deuotionis nobiliorem fecit, non designauit cogitatione locum qui *Authoris* nomen aeternum ferret. Quid si caeleste studium interpretationum patitur ex factis, Et, quae visa non sunt, fidem habere possunt ex causa, crediderim *D. CASIMIRVM* *Clienti* suo vicissim *Arcum* erexisse, qui longum annorum cursum ad festinatos honores Et constan-tem famae Et felicitatis moram transmitteret: opibus insuper tam bene impensis fauisse, ut mansuris in fastigio accessibus consisterent, augerenturq̃. Quid me ceterorum quoq̃ impendia adducerent, si singula disse-rere vellem. Quid *Academia Vilnensis*? cuius solennes labores

labores recurrens in orbem supplicatio amplexa est, ut
primitias beati fauoris in ingressu concessas, reditu cu-
mularer, & non nouam tantum in cultu industriam,
sed eruditos etiam sudores gemino transitu solaretur?
In quæ dicendi spatia peruenirem admiratione studij,
quo Vilna potissimam fori sui faciem tota insedit, &
sua ubique diffuse summam fecit alacritatis? noctis
inter faces, lætitiarumq; immemoris tenebrarum? ignum
in altum expressorum sub celo lusus?

Tui hec ingenij fuit pietas, VLADISLAE Rex
Inuictissime, qui Reip. animus, vniuersas tanti cor-
poris partes commouisti. Merito itaque integra cla-
rissimi per omnes fusi facineris magnitudo ad Te Au-
thorem redit. Omnia per singulos dispersa religiose li-
beralitatæ vel obseruantie momenta, quoniam à Te
profluxerunt, in gloriæ Tuae amplitudine colligi neces-
se est. Atque ita Oceano equasti Tuae copiam pieta-
tis, ut & intra capacem religionis Tuae curam omnis
subditorum se voluat imitatio, & laude recurat ad
cumulum, quidquid exemplo prodijt. Non possumus
angustè Tuam explicare virtutem, quæ per innumeros
diffusa, recepta deinde in Te, maius reperit spa-
tium. Tuum, nostrumq; est, quod egisti: & eò qui-
dem magis nostrum, quia Tuum. Liceat tamen mi-
hi liberè conqueri. Maiore vi usus es in nostros af-
fectus ac mores, quam nostra necessitas, aut Tuarum
virium ratio exigebat. Quis enim ad D. PRINCI-
PI S honorem Tuis votis non iuisset? quem non du-
xisses ad eadem, aut paria nutu? Ut quietus sacris
inclusus palatijs audires, spectaresq; caelestem omnium
lætitiarum, valetudo afflicta volebat: imbecillitatem in
Te ad cultus prosecutionem agnoscere noluit. impe-
ditum fortuito morbo pedum officium proponebat: non
admisisti excusationem. egebat sanitatis cura latè con-

ciliato domestica umbra silentio : Regium esse sanari
publicis curis dixisti. Quis Te adeò Tuis aduersum red-
didit commoditatibus, ut vitam non traheres commo-
dè ut Regiam : non sollicitè ut publicam : non tran-
quillè ut indigentem : sed robustè pièq̃ inter grauissi-
ma quæq̃ negotia circumferas ? O egregiam nulliq̃ ta-
cendam Tuam virtutem ! Pulcherrimum inuenisti in-
uicta Tuae fortitudinis campum, ut quâ contra hostes
usus es strenuè, salubriter pro Rep. contra Te san-
ctè utereris. Meritò Te subuectum frequens vene-
rata est multitudo hominum, & quoniam ex absen-
tia egrescebat dolore, deuoto morbi Tui obsequio ad
gaudia conualuit. Tibi igitur communem festiuita-
tem debemus restitutam. Nam licet integros nos fe-
cisset sola Tuae voluntatis lex ad solennem D. Tute-
laris venerationem : Tuae tamen egritudinis vultu o-
mnia egissemus, & conferentes simul diuersa animi
discordis indicia, hilaritatem expressissemus marore.
At Te conspecto nubila mentes suam recepere sereni-
tatem, integrâ fronte occurrimus faustissimo diei : æ-
quabili imperio plenum pectus capit regi. Quidni
v. rò regeretur ? quandoquidem uno in triumphali
spectaculo geminorum Principum coniuncta Maestas
desiderium oculorum, rara cum letitia populorum
cunulæ expleuit. Et CASIMIRVS quidem vi-
ctorias suâ ope partas indicabat. Tu subijciebas. Ille
quasi triumphantern præibat : Tu sequebaris. Planè
ita cuncta ceciderunt, ut nulla Tuae glorie pars latue-
rit in alieno plausu. Videreris licet illum alteri fecis-
se : nos Te, non seiunximus. processeris sanè supplex :
hoc erat Triumphatoris indicium. Comitum Te feceris
sacra actionis : Principem Te, & quidem geminatâ
authoritate agnouimus. Paterna enim pietas primâ o-
peris huius excitatione nobilis in Te simul effulsit, atq̃

ita antiquis desiderijs suffecit, ut nemo abesse crederet iam redditum celo Patrem, qui Te intuebatur. Accedit, quod prouideris, ne CONSTANTIAM Reginam magnifici sociam laboris in tanta spectaculi copia quisquam desideraret. Apparere enim voluisti in eodem spectabilium virtutum theatro Augustam Sororem Tuam ANNAM CATHARINAM CONSTANTIAM, quæ Matrem ad superos receptam constanti probitatis miraculo redderet. Et verò ample satis illa in tantum nomen sonuit, effecitq; ut in florescente indole verecunda honestatis maturitas cerneretur, & altus crescentis gloriæ gradus fastigium amulo aspectu exhiberet. Digna profectò quæ ad Maternæ laudis imaginem tam clarâ origine institutioneq; & tanti Fratris felicitate venerit.

Quod si ea huius operis est vis ac potestas, ut Orbis terrarum sufficiat, quod igitur tandem maius iam dari potuit lætitiæ honorisq; ornamentum, quam cum tantis comitibus D. CASIMIRVS suam obiit urbem, populoq; inuisit? Constiterit sanè beatè in suo illo Mausoleo, cuius omnis ætas mirabitur pretium, & splendorem: beatiùs tamen iuisse dicendus esset, nisi eadem præsentia pulcherrimum illud domicilium cohonestasset. Spectabit id ad perennem cultus securitatem, quod factum conspeximus, ut quivis oculis hauriat venerationem, cuius inuitamentum. Stabili sedi liberalitas & præsentia impressit. Ne quis suorum malus custos laborum opes cupiditate obseret, malitq; collectas ad avaritiæ hereditatem tueri, quam ad diuini Numinis gloriam explicare, occurret ei SIGISMUNDI III. munificentia. Ne se subducas sacris obsequijs presumptio alicuius dignitatis, ULADISLAVS IV. potenti ad pietatem corporis debilitate conuincet. Ut verò in eum locum perpe-

tuo accursu omnis se recipiat necessitas, aurea lampas,
 splendidum. **CONSTANTIÆ** Regine munus,
 Virginali Filia manu ante aram suspensum, alluce-
 bit. Et scimus nos quidem fore, ut ab admirandis e-
 uentibus iam, pridem, nata deuotio, suam deinceps
 prosecutura sit institutionem: à tantis tamen, tamq[ue]
 heroicis factis ingens venias necesse est precandi fidu-
 cia. Felicem certe Poloniam tanto bono. Inde enim li-
 cebit successus domi militiaq[ue] alere, populorum accipe-
 re salutem, vires fortunamq[ue] contra hostes educere,
 ubi tanti **PRINCIPES** suam exercuerunt pieta-
 tem, deposuerunt victorias, triumphos consecrarunt.
 Hic ego quoque, **D. CASIMIRE**, humile hoc
 laboris mei obsequium appendo, ut veniam au-
 dacie, quâ tuas virtutes tractavi, depre-
 cer, & quod stylo detriui, immorta-
 li suorum operum compensem
 argumento.





